

江
西
詩
徵

江西詩徵卷八十九

南城曾煥賓谷編輯

釋子

大訢

大訢字笑隱俗姓陳南昌人家世業儒去而學佛
師晦機熙公住杭之鳳山遷中天竺天歷初召爲
太中大夫主龍翔集慶寺事設官隸之虞道園嘗
序其文歐陽圭齋亦甚推之有蒲室集

期石室不至

風水不可期知君定來否何處唱歌聲月明大谿口

梁楷田樂圖

作勞田中歸酒味薄可流人生一醉飽良不負吾腹牽攜
影參差歌吹非有曲流風一胥靡此樂不可復吾人孰非
古亦有心與目封倫恨不留重賄貞觀俗昔在唐虞世苗
民有不服地境知良農膏瘠求善牧願持畫史心獻君比
和玉朝來愧斯圖惻愴意未足

顏暉猥

峽冬拖長冰崖滑如積鐵客子涕縱橫悲猥助嗚咽仰視
浮雲崩再聽蒼石裂不畏行路難但感芳年歇

初發金陵泊龍灣寄茅山道士李方外

人生不必行萬里亦不願讀萬卷書願爲茅山十日客山
僧坐列羣仙圖大風揚旗出天闕小峯萬馬爭奔趨衆頃

波濤忽破碎木末飛上金畢述青書畫曉壇室靜玉鞭夜
擊聞傳呼去年獨宿丹井下天風拂地迎麻姑今年許入
玉柱洞誰遣旅食隨檣烏懷人弔古夜寂寞寒江落月號
猩懸祖龍埋金王氣歇梁宮晉苑沈煙蕪想見雲龍映朝
日山中宰相良非迂

曹伯珪築室曰桂齋戲作俳偕體

阿仙騎蟾白銀闕醉折秋華餐玉屑霓裳曲散墮清塵涼
夜素娥悲白髮玉輪碾香空翠寒流光萬里君合歡大星
漸低海色白高齋翠影空團團萬卷芳心期厚地憔悴秋
香忍相棄百年若使富貴羈淮南小山歸不歸

送趙公子去疾侍平章魯公歸蜀

所羨還鄉樂茲行得侍親魯公黃閣舊宣詔紫泥新給傳
舟車備承筐玉幣陳會靈奔岳瀆移次動壘辰父老懷遺
愛朝廷眷大臣百年輕重計一舸去留身子職共承重親
知屬諭諄行庖供膳早張燕進觴頻寶瑟調銀甲瑯盤繪
玉鱗雲林還弔古風物獨傷神地勢金城壯山光錦浪勻
江喧初上峽樹遠欲通秦牛女天河夜魚龍野水春豐碑
臨最屬高冢撫麒麟側聽歌淇澳猶聞起渭濱上尊羅甲
帳仙仗擁蒲輪朽櫟依瓊樹飛花戀錦茵裁眉等舊約谷
口卜芳鄰願結香山社終陪綠野賓相期無遠別萬里月
隨人

述懷送觀空海歸臨川七十韻

幼慕空門貴高蹤世可遺功名輕閱閱塵土豈磷緇澄觀
難居俗湯休不廢詩三生猶有習四海豈無師身去江湖
遠山空雷雨垂諸方驚老宿同舍走羣兒素昧平生願居
然會面期解牛須肯綮相馬必權奇壯業期軒輊新功日
倍蓰氣豪空虎穴戰勝失魚麗五載靈谿寺千章白雪詞
清遊忘旦暮物論不瑕疵奎畫前朝祕清霜古佛規巖空
狐有塔山古寺無基松燎供宵讀芹香助午炊凍泥蛙似
蟹春雨茵如芝遠客愁獺村童抱鹿麕雲藏吳猛廟雷
護柳公碑物色紛難數雄材應接疲願終盤谷隱恥事北
山移未覺歡娛盡深蒙造物私寒巖徒刻畫元氣忽淋漓
共喜師門盛何嗟友道睽青山吳甸沒白水楚天涯落日

三年望浮雲兩地思驛書勞白鴈貞信卜元龜果爾期雞
黍同心感鐵鉉羣公來雜選餘子去委蛇風日矜神駿雲
霄刷羽儀古今存道統師友得綱維今代誰潛子宗門一
器之聯芳端不忝清要合如斯自許奔流象何知測海蠡
皮夷開樸橄洗滌脫瘡痍弔古多閒暇登臨甚忸怩山河
秦百二宮闕漢累恩黃壤侵銅狄春風動兔葵林蘇俱異
物標畫不同時志大交難合歌長聲愈悲近人山擁座照
席月臨池正擬追金玉方將脫羈羈不才還涉世中道遂
分岐相失嗟狼狽無謀晒鷓鴣交情淡於水真味美如飴
衣綻寒分絮囊空遠貸貲鴈原兄弟急狂猷簡書疑仁者
應無敵將軍自數奇波濤孤梗汎風雨一巢危亡命憐張

儉逃生愧范雎百年俱縶綬千里許驅馳誓欲同生死那
能顧渴飢推恩豈望報非德竟何爲吾道縣孤注叢林失
一夔老師甘屏棄弟子頌期頤逝水歸東壑流光及崦嵫
空餘匠石斲誰善宰夫脔行獨招羣忌名高得謗隨長鳴
悲病鶴老氣臥孤隰入室猶橫榻承顏或奉匱樓孤金驛
遠河直玉繩欹未厭從師樂其如念母慈江雲連穠樾山
雪溼茅茨短世驚炊黍成功付覆茗何曾犀首貴空作虎
頭癡白日眞成去青春有別離風煙辭北固江漢抱南箕
浪穩饒蛟睡天長白鳥遲鄉關迷遠近雲樹暗參差幸喜
收蠻獠於今靜鼓鼙詩成須數寄清響播墳簞

送何彥敬赴山東憲幕

風物中州美人材聖代優恢恢光岳合肅肅羽儀修省署
千官盛臺綱衆目收諸公多汲黯文椽獨何休健筆回天
險精機洞鬼幽霆奔羣蟄奮翬負五山浮責已常存恕知
人庶寡尤平生周禮樂後世魯春秋西極銷鋒鏑坤維得
綬旒元功推衛霍首罪竄共兜陳寶無祠雉桃林已放牛
九天行日月一命重山邱幕府非閒散山東且勝遊鷗車
馳羽檄霜刃避吳鉤白下諸侯酒淮南使者舟風濤稍退
鷁月冷動潛蚪歷數無雙士誰爲第一流託交慚素昧道
術得相求塵土緇衣浣山林白髮羞送君因有感莫色起
滄洲

送張用鼎遊燕南

天上知名久由來漢客星江湖歌白雪風露滿青冥巴蜀
須傳檄燕山待勒銘壯夫期遠大不獨抱遺經

黃河阻風

九域重尋禹蹟荒喜聽縣水夜浪浪中原迤邐河流壯元
氣汪洋地脈長萬里風雲來黯澹五更星斗下光芒我行
不有神靈助風送天香自帝傍

送郭幹卿學士赴奎章閣次趙魯公韻

歲晏俄聞上國行安車可是莫年情早朝翠霧沾衣溼夜
直銀河入坐清社稷憂勤霜鬢短江湖歸夢釣絲輕相攜
不盡丁寧語歌斷驪駒白下城

賞心亭

石印詩集 卷之十九 五
碌碌從人媿抱關賞心應共鶴飛還孤舟野水東西渡落
日長淮遠近山神鼓乍喧香霧合賓筵初散綠陰閒相思
只尺長相隔一似河流九曲灣

古廟折碑圖

古廟殘碑野水村行人回首暗消魂遙天何許孤雲沒不
盡青山萬馬奔

虞伯生學士以五詩贈一上人蒙見及一公將歸蜀
謁趙魯公次韻

醉罷葡萄金叵羅散花方丈寫伽陀扁舟許我從公去浩
蕩江鷗萬里波

魯國數年書疏斷每思高會聽雲和別時有約終相覓絲

竹江頭雨一蓑

孤嶼圖爲鴈山德長老題

澹煙疎樹月朦朧路隔寒潮斷復通
添箇茅庵分我住明年飛錫海門東

月支王頭飲器歌

呼韓款塞稱藩臣已知絕漠無王庭
馳突猶誇漢使者縱馬夜出居延城
我有飲器非飲酒開函視之萬鬼走
世世無忘冒頓功月支強王頭在手
帳下朔風吹酒寒凝酥點雪紅爛斑
想見長纓繫馬上髑髏濺血如奔湍
手麾欲回斗杓轉河決崑崙注尊滿
酒酣劍吼浮雲悲使者辭歡歸就館
古稱尊俎備獻酬孰知盟誓生戈矛
斬取樓蘭縣漢

關功臣猶數義陽侯

曹娥江讀碑圖

海門五月潮如山龍伯最屨蒼蛟頑越俗輕生好巫鬼婆
娑踏舞洪濤間羣巫蛟服盱獨好歌聲忽絕紅旗倒孝娥
死抱父屍出天地無情日杲杲雄詞不媿邯鄲兒萬金莫
購中郎題碑陰八字非隱語德祖有智如滑稽豈是阿瞞
不解此感媿上馬歸路迷女德猶能奮其節壯夫氣吐萬
丈霓奸雄復欲欺後世白頭猶愛漢征西丹青似是董狐
筆千年要與竹帛齊娥江新廟照江水可憐銅爵草萋萋
太白觀瀑布圖

我本白雲人見山每回首披圖得松泉感我塵埃久我家

只在九江口從此扁舟到牛斗翻愁天上銀濤堆石轉雲
崩萬雷吼水行地底不上天龍泓豈與滄溟連風葉無聲
飛鳥絕月光雲影天茫然丈人何來自空谷謫仙招隱當
不辱林梢噴雪舞飛花尙想隨風唾珠玉馬首青山如喚
人歸來好及松華春泉香入新釀解公頭上巾今者孰不
樂荒墳委荆榛遂令畫師意萬古留酸辛酸辛復何益東
海飛紅塵

駿馬圖

世無伯樂亦久矣駿馬何由千里至披圖猶似得權奇豈
伊畫師知馬意何人致此鐵色驪旋毛繞腹新鑿蹄帝閑
遠謫天駟下馳來月窟浮雲低古王有土數千里八極周

遊寧用爾方今萬國效奔命合遣龍媒獻天子
飈馳電沒爭辟易萬里所向無前敵男兒馬上
定乾坤腐儒詩書果何益幾愁骨折青海烟黃
沙野雪穹廬前幸逢好事寫真傳似向長鳴誰
與憐嗟我身如倦飛鳥十年繭足愁山川安得
千金購神駿攬轡欲盡東南天

會曹伯珪

故人乍見如生面良久熟視乃驚呼六年怪我
憂患餘不應豐美如瓠壺煖湯濯足敷座坐呼
童嬰玉羹土酥攜過雙林謁大士天花吹墮紅
氍毹斷穗清霜農圃淨寒鴉落木漁村孤從
遊復恨冬日短張燈待月松堂虛淵明不人
惠遠社社子頗是賈公徒彼皆難難困生理
好事豈有

樂日曹君曹君慎勿疎他年念我專壑居夜來奇夢果有
徵乘風萬里雲龍趨

次韻張夢臣侍御遊蔣山五十韻

勝遊還送客秋日淨郊原別酒歡逾洽行厨禮不煩楓林
生晚吹鞠沼媚晨曦滿座金貂貴斯人玉雪溫絲綸承異
渥黼黻進嘉言宥密皇猷重才華大雅渾披雲簾挂玉前
席錦爲墩接武夔龍地冥懷鴈鷺村外臺分重寄南服占
名藩登麥初橫榻迎春及賜旛馮高荒塹沒弔古斷碑昏
種竹期招鳳尋僧共聽猿洞呀獐蟒化海立怒鵬騫珠鉤
沈習井金鋪委壤垣國初遺老在江表故家蕃及物多膏
澤爲邦固本根化行民自信身退道彌尊美俗時不變吾

人溺可援山川還寂寞歲月去翩翻廢館弦聲絕虛龕猶
像存苔斑飢鼠走梅臥野蜂屯除道看驄馬來儀集采鸞
傳呼驚鹿鉅笑語荅江喧撫跡多遺恨懷人欲斷魂馭風
寧有待斲聖妙無痕師表儒林盛賢勞王事敦不求金躍
冶但愛土爲墳陳寶徒祠雉桓溫苦化竈青山隨地好朱
實著霜繁克味和椒桂同馨佩芷蓀衡廬肩可拍參井手
先捫說劍雙龍吼揮毫萬馬奔築臺先自隗學圃恥如樊
破納多年冷窮檐傍午暄不才甘朽櫟何幸在高軒蕪穢
煩芟剌泥塗賴力掀班揚鋒遠避屈賈氣還吞舉世懷燕
石惟吾重魯璠三光開渾沌萬派出崑崙喜接東山展明
陪北海樽辱知榮篋帛懷德報書多稼欣逢歲嘉穰更

滿園雲霄翔鶴鶴溟渤偃鯨鯢寒士勤嘘拂諸生淑討論
望塵趨末路立雪候重閭緣忝三生舊心冥萬化元棠陰
思召伯柳色憶王孫精衛慙填海神鰲力負坤他時愁遠
別此意竟難諼嵩華相從去重窺玉女盆

庚午秋過淮安

百感何嗟及行人過楚州笛聲今夜月雲物向時秋古驛
依城住長河傍海流天王南狩日曾此駐鳴騶

送薩天錫照磨赴燕南憲幕

蕭寺留詩別高懷不負公江聲元自急山勢古來雄下榻
疎鐘雨登臺落木風重來無幾日除道避乘驄

萬歲山

蜿蜒金翠倚青冥虛谷時傳萬歲聲葆羽璠旃雲氣溼玉
龍鱗甲夜寒生關河拱挹皇居壯宮殿深嚴聖慮清自愧
山林麋鹿性也隨鵝鷺到承明

高彥敬尙書墨竹

西域高侯自愛山此君冰雪故相看蒼梧帝子秋風淚翠
袖佳人日暮寒妙處寧論鐵鉤鎖深情莫報翠琅玕誅茅
何處陰厓底靜看梢頭玉露漙

仲實復和見貽勉答

佛國親登七寶塢見超無見總持尼情塵空盡還同俗結
習都忘不斷癡東嶺雲歸招共宿北山鶴怨任他之吾徒
未識毘耶老衣染天花不自知

次韻答熊以善秀才

陞堂齊赴鼓隆隆獨著儒衣謁嬾融也勝朝回隨鴈起西
風千騎過雲中

舟至通州夜雨大作

明日京華拂面塵穹廬如雪馬如雲雨聲未忍孤篷別故
遣蕭蕭枕上聞

送別

行役何時了宗門可罷參棲遲無杜曲留滯尙周南渡水
聞天聲登山禮佛龕百年重回首風柳正毵毵
沙鳥高低語江雲斷續飛青山携手別秋月故人稀落落
芳心在悠悠昨夢非歌長不用續鯨浪暗吹衣

送睢陽王德明辟內御史府掾

巡遠睢陽後遺風士氣豪
河經商邑壯山並闕臺高
月窟求龍種天池集鳳毛
辟書寧易致不用歎賢勞

楊執中幼與予同舍自予去鄉里一別四十五年矣
乍見俱不相識承惠詩一首次韻謝之

勛業雙蓬鬢江湖萬里心
扣舷山月近欹枕夜濤深
多士懷東觀何人賦上林
只將絃上趣白雪寫遺音

米元暉江山秋晚圖

紅樹宜秋晚澄江媚落暉
扁舟如喚我莫待白頭歸

予作庵東園將謀退休希古禪師寄魚樂圖索題感
而賦此

築室開池學種魚旋縈三島作江湖圖中更覺烟波好
水寒塘折葦枯

百雁圖

既集還飛水正深風驚葭葦亂
爲傳書到上林

寄西山李處士

每悔西山水竹居秋風林影夕陽疎
用嫌人索報書

猗蘭辭

野漫漫兮葉施霜
見兮以渴以飢湘之涉兮阻且躋
挂長蛇兮吼元羅景翳

翳兮歷嵒嵒念徂歲兮愆芳期羌不畏兮華色衰誰招魂
兮若有知邇長風兮覽余懷寄音塵於竹帛兮猶不媚兮
厥姿玉之蒨兮參差風之佩兮陸離芳菲菲兮闔吾帷絙
朱絃兮待之娛予之獨兮澹忘歸

山雲辭

并序

干上人結庵餘英山中揭所居曰半雲夫雲之爲
物不多寡大小形也而曰半何哉不以離世絕俗
人不得而友之能不趨利而合不避害而散同於
無心疏於無跡惟雲克肖焉於是空半室以居之
朝夕容與而不異也笑隱子懼其久而忘之欲固
其盟遺之以歌

南山兮朝儕夕容與兮水涯復值何兮余次賓而肅之兮
款扉撫瑤席兮布函丈樂無斁兮澹忘歸褻不瀆兮去不
違毋軼其疆兮猶有畛畦山中之人兮薜蘿衣游萬物兮
守天倪行之獨兮世無知匪雲之從兮其從誰

泉石爲錙君安賦

泉之始達維石齧齧不盈瓶罍而酌不竭決而疏之爲江
爲湖澤及于物不如其初是故君子道不苟售雖有夔臯
愧于巢由我石孔貞我泉孔腴維德似之永矢弗渝

送欽上人

我有錦繡段翠鯨卷波濤君家古刀尺裁剪不憚勞散作
五色雲隨風九天高天高望不極江水日滔滔

惟則

惟則字天如俗姓譚永新人師普應國師中峯本
公闕吳城東北隅廢圃爲方丈曰師子林倪元鎮
爲之繪圖徐幼文復圖爲十二景高季迪諸人題
咏相繼又嘗遜跡松江之九峯加號佛心普濟文
惠大辨禪師有師子林別錄

筆策引

并序

西瑛懶雲窩距余禪室半里許時相過從吹筆策
以爲供復於余言有所需乃賦長歌以贈

西瑛爲我吹筆策發我十年夢相憶錢唐月夜鳳凰山曾
聽酸齋吹鐵笛初吹一曲江風生餘響入樹秋鳴咽再吹

一曲江湖驚愁雲忽低霜月黑坐中聽者六七人半是江湖未歸客歡者狂歌繞樹行悲者垂頭淚沾膝我時奪却酸齋笛歛襟共坐松根石脫畧悲歡萬念消悟聲無性聞無跡西瑛篳篥且莫吹篳篥從古稱悲栗悲歡茫茫塞天地人情所感無今昔山僧尙賴雙耳頑請爲西瑛吐胃臆聲聞相觸妄情生聞盡聲亡情自釋盡聞莫謂聞無聲機動籟鳴無閒隔亡聲莫謂聲無聞去來歷歷明喧寂吹者之妙余莫知聞者之悟公莫測公歸宴坐懶雲窩心空自有真消息

贈道林訓上人

角鷹一側目所視無穹蒼臂鞬索飽非所長良馬一振鬣

所向無窮荒內閑待秣安可常丈夫心膽塞天地身與世
道爲低昂況從世外發高趣蓬蒿豈足誇翱翔我憐古道
滿荆棘歲晚狐兔爭跳梁今年識君谷水傍愛君駿氣如
鷹揚願君莫如我學步成踉蹌願君莫如我用拙甘六藏
茅舍深居已無馬師問梅子木葉蔽膝尙有懶瓚知南陽
九峯之外天茫茫寒梅欲花春在霜興來拂袖謝邱壑闔
視四海皆吾鄉我有解纜歌一章如擊瓦缶無宮商吳松
江上爲君歌一發怒潮卷雪天風狂

吳松江觀閘

吳松江水急如箭昔見畫圖今識面百川應命爭先趨東
注海門如赴戰海波怒發驅潮頭戰退吳松水倒流江潮

一日兩相鬪萬古不決猶寇讎江水清兮潮水濁江水不
似潮水惡惡潮推出海中洲堆積江面成山邱官憂水害
難疏鑿橫江四閘同時作潮來下閘潮平開閘內不通潮
往回潮波怒息捲底去閘門又見江波怒閘上盤渦萬陣
分開下狂瀾萬騎奔萬雷吼兮萬鼓發石走沙飛亂戈甲
黃河衝破華山根健瀑壁開青玉峽人言水性險且凶不
知水與人情同情濤識浪怒且憤不在江潮在方寸水險
尚可避人險終難知人爭領領罔晝夜水爭尚有潮平時

城南樓

城南樹尾花風晴城南樹下漁舟行隔溪竹屋數家酒矮
簾路轉人縱橫仙山石洞在眼底塔竿倒影滄波明相期

待渡日已晚坐看平野青煙生

遊三相臺示甘楊諸友臺乃姚崇牛僧孺劉沆讀書處也

我登三相臺南望雙吳峰俯視下界如凌空開元老樹可
百丈斷崖盡日呼顛風甘郎攀果學獼挂楊子枕石飛泉
中垂藤離地坐我穩袒跣長嘯如乘龍嗚呼昔人不再得
臺上土花幾秋色前身不與後身期白雲豈識蘿衣客安
得近代顏輝來畫我石上驚風雷

眞州送別悅希雲

欲別不別重相攜別思已逐寒雲飛飛雲一去不可得千
邨萬落明斜暉回頭望吳山滿目青依依亦如送我望我

去立盡風煙未忍歸

送止照歸古洪曲江

莫雲飛上錢王臺亂峰蘸碧湖光開六橋春色看正好之
子不肯重徘徊百年萬事煙雨過鄉井一念終難灰浩歌
歸去送歸去夢斷楚水何時來

鑾江鎮上雙江洲大船解纜荒洲頭挂帆蔽空槌鼓發白
浪卷雪風蕭颼故山三日忽到眼恍忽天上飛驂驪向來
歸興有如此今日送子心悠悠

獅王一去挽不回秋滿巖谷天風哀龍困象藪亦多士濟
濟熟視宗綱頽誰能共埽松下屋黃精黃獨連門栽霜休
月上芋香起指點深撥寒鑪灰

入仙洞山

入山隱隱如聞雷
山雞角角隨人飛
松風洗我市喧耳
松露灑我青蘿衣
平生結習重幽賞
會景會物情依依
誰能歌紫芝
我當歌采薇
招呼雲外青鸞歸

上海舟中卽事

烏溪出閘催雙櫓
急趁回潮下黃浦
午前期到上洋城
生怕潮來近亭午
夜潮已落岸痕高
風卷浪花翻雪滿
渡頭趁渡人如雞
水行泥行亦良苦
西岸衝波遠入村
東岸湧沙作林圃
岸上居民無定蹤
頗怪潮行無定所
吾年五十遊上洋
今歲重來五十五
豈無玉雪美少年
向來一擲成千古
亦有鳴張萬石家
勢去一朝無寸土
噫吁嘻人生幻

化若浮雲陵谷變遷何足數

示友人

塵網苦多累暫閑如脫羈胡爲塵外跡而乃東西馳聚談
每倉卒旣遠翻多思眼前失真宰身外何求知百骸如僕
馬勢合聊相隨氣運忽遷謝一散無重期來日不可待去
日不可追靜緣當自保世故方無涯

登西林

沈鬱難自居偶思散遐矚拄杖登西林斷崖倚修竹崖上
叢花開飛禽自相逐崖下清川流水光泛嘉木四月風雨
多平野一時緣俯視萬化間煙雲起空谷

遊茅山雲林清遠之館

華陽有客似重來新見雲林別館開寒日半巖松鶴起腥
風萬壑雨龍回琴牀流露滋瑤草丹鼎飛春上玉梅居者
未知清且遠人間咫尺望蓬萊

漕運萬戶某脫險于海因和韻唁之

語未開唇已改顏向來海運歷多艱連檣影落蛟涎窟孤
枕魂飛鬼骨山出匣劒龍驚怒吼傳家珠虎幸生還黃金
任積高於斗不博休官一日閑

送時無擇維那歸閩

百計歸難禁生緣樂未窮聽鐘柳葉雨欹枕荔花風客久
閩音化交深楚俗通片帆明日遠雲斷海天空

登茅山天市壇

天市危闌倚碧空
兩京山水見冥蒙
東來十日風霜路只
在寒嵐一抹中

一峰雲外庵和韻四景

碧虹分雨半山橋
橋下春雷卷怒濤
老衲定回推戶看
隔溪開盡野櫻桃

竹屋茶香滿澗煙
綠杉深處響流泉
目前有法誰能說
落日微風一樹蟬

平田水語稻花香
半解蘿衣受晚涼
景物雙清秋正好
亂山雲外又斜陽

衲被蒙頭宿火紅
雪寒愁聽上方鐘
開門忽怪山爲海
萬壑銀濤露一峰

湖邨庵卽事

竹根吠犬隔溪西
湖鴈聲高木葉飛
近聽始知雙櫓響
一燈浮水夜船歸

訪仙洞山舟次大溪口

窈窕仙家何處尋
夕陽明滅亂雲深
大溪橫斷青山合
一路風帆入樹林

贈弟仁遠入京

并序

始余別家時仁遠從弟年纔十七今將四十矣鬚髯戟張言論有遠志以湘南教官滿考乘風爲上國遊艤舟維揚迂道來徑山相尋梅雨中禪榻共燈數夕旣行贈偈四章以紀別思以戒其速歸

虬鬚鐵面岸綸巾
膽氣麤豪語逼人
二十三年不相見
却疑年少是前身

雨嶂煙巒翠欲流
天開圖畫萬山頭
凌霄閣上凭闌意
留與他年說舊遊

白雲峯在夕陽邊
目送吳雲入楚天
汝到燕山却回首
三千里外又三千

錦袍花暎鳳池明
玉珮光搖紫府青
富貴著人如醉夢
倚門慈母眼長醒

曉行吳松江

水轉沙涂又一灣
迎船孤塔出煙嵐
長江一道橫風起
兩岸爭飛上下帆

師子林卽景

萬竿綠玉繞禪房頭角森森筍穉長坐起自攜藤七尺穿
林絡繹似巡堂

素壁光搖眼倍明隔簾風樹弄新晴樹根鼉鼓鳴殘雨恍
忽南山水樂聲

半簷落日曬寒衣一鉢香羹野蕨肥春雨春煙二三子水
西原上種松歸

道人肩水灌畦蔬托鉢船歸粟有餘飽飯禪和無一事繞
池分食餞遊魚

斜梅勢壓石闌干花似垂頭照影看白晝雲陰天欲雪半
池星斗逼人寒

雪深三尺閉柴荆
歲晚無心打葛藤
立雪堂前人不見
秀雲峰似白頭僧

送鄉僧昱曉林

海雨吹花雪作堆
那時敲我竹門開
自憐水國三千里
也有鄉僧問路來

風沙風葉攪征衣
今日江頭送汝歸
西望故鄉何處是
楚天漠漠片雲飛

鄉夢鄉愁我已疎
十年不見故鄉書
兒時聚首人如玉
老大不知今有無

鄉人問我幾時還
向道如今又入山
一箇蒲團半間屋
吳淞江上九峯間

登茅山天市壇

白雲剪作瑤壇雪寒旭爭開玉洞花
山北山南看更好炊烟朵朵是僊家

贈衛學古携墨入京

吾聞李超之墨不易求建隆天子掠聚如山邱
汴京僧寺用爲漆庫藏一掃難再收又聞潘谷之墨若圭璧蓬萊宮人玩未休
大風捲土入沙漠歲久物化無能留衛君學古得古法潘李之外非其儔
授書絳帳東高閣烟室坐擁絳衣裘月涼深夜杵膠熟翠餅入麝龍紋浮馬肝石上吐雲霧
一點落紙光欲流玉堂操觚諸公籍子爲不朽金闕待賁子亦藉是爲豪遊
世人知好不知價曾有造物知相酬

造物果爾知相酬誰復美元香太守松滋侯

補之梅

人皆謂補之畫梅宮苑梅千樹萬樹潑撒瓊瑤堆天香國
艷發乎本然之富貴非比疎枝冷葉困蠻烟壓雨之摧頽
畫成曾獻羣仙府求者黃金賤如土仲謙山翁何處得兩
株照耀林壑見者驚相呼一若羅浮山下水南之獨樹氣
條無數花無數一若成都十丈偃蹇之臥龍身隔重雲尾
梢露玉甲鱗鱗水底明水面鴛鴦啣落英上有飛來雙白
鷺疑是雪坡天夜晴山翁有時坐梅間搖塵拂寒日清輝
射牕壁恍忽天人爲法來滿林新雨花狼籍吾然後知補
之能爲梅寫真梅花又爲翁傳神翁比梅花更清絕眼光

燦破珊瑚月

東坡竹

人皆謂東坡畫竹翰林竹千竿萬竿解散琅玕東渭川淇
澳出乎浩蕩之胷中非比寸土寸金不許破堦前之苔綠
暮年健筆尤可憐世有一二非真傳仲謙山翁何處得四
幅妙歷與可不敢誇先鞭雨者帶霧和烟空濛翠欲滴似
隔西湖見山色雪者堆鹽積玉勢重如崩山強項暫低腰
未折風者飄飄鳳尾搖耳邊彷彿聲蕭騷晴者扶疎淨如
洗亭亭欲立於雲霄山翁有時坐竹間觀笋稚老嫩生成
非造次兒孫環列奉親歡俯仰折旋無不似吾然後知東
坡能作此君圖此君又似翁之徒吾道叢林有生意一日

跟前何可無

萬載異僧

萬載人劉原祖名漢芳至正六年建陰陽齋會七
朝忽有異僧古貌跣足破衲癩身臭穢難近持鉢
前來覓食衆皆避嫌詬罵原祖獨食以飯問亦無
言惟以背抵牆壁若指癢之狀摩抄良久穢氣稍
息僧持鉢歛然而去忽馨香滿室原祖知爲仙急
尾之窅然不見視壁間有詩云云旬餘原祖無病
而逝或疑原祖前身與此僧爲侶同居伏虎巖也

詩

不是山僧特地來因遊南嶽返天台青衣童子多饒舌黃

面瞿曇笑臉回鐵鉢滿盛貧子飯布衣難覓富家財殷勤
傳與劉原祖伏虎巖前花正開

雲半間

雲半間姓郭元末泰和人幼祝髮於護國寺及長
厭其繁雜穿石鑿巖而居每食必分魚鳥萬羽千
鱗一呼畢至不爽其期誦經虎伏而聽揮麈乃去
穴居數十年有詩云云遂號曰雲半間郭子章爲
作傳

山居

千峯頂上一間屋老僧半間雲半間昨夜雲從風雨去到
頭只有老僧閒

一初

一初分宜福勝寺僧虞道園極稱之

按同時有高陽僧守仁字

一初別
是一人

贈虞學士集

翰院虞夫子名聞四海傳偶携天上月來繫寺前船一見
如曾識三生定有緣不嫌雲臥冷與我共流連

和虞學士

老却黃花客未知回舟旬日漫相期龍江話月銜杯久懶
徑看雲步屨遲天地長懸司馬記山川有待杜陵詩錦囊
收拾同誰讀側耳蛩聲入思時

廷俊

廷俊字用章號懶庵鄱陽人一云樂平人薙髮後
謁大訢于中天竺至正末主西湖淨慈寺危素稱
其善記覽於前人出處言行雖千百年如指掌洪
武元年示寂於鍾山閣維舍利無算葬日天花如
雨有泊川集

石頭城次王侍御韻

袞袞長江去不休巖巖盤石踞城頭千峰日落淮南暝萬
樹風高白下秋流水尙遺諸葛恨東風不與阿瞞留中原
一髮青山外萬古終爲王謝羞

翠微亭

誰構遺亭莽蒼中蕭蕭深谷起悲風五更蟾月初沉海萬

里銀河欲瀉空江闊淮南連畫鵲雲開塞北見飛鴻黍離
不獨周人恨滿目寒烟六代宮

有渡

有渡方舟小無家道路長大荒天渺渺滄海日茫茫水母
浮還沒風鴛出復藏不須寒鴈叫客意已淒涼

未歸

甌越山無盡江湖客未歸北風吹雪冷南雁貼雲飛斷路
迷行跡驚湍濺衲衣本來無住著何事却依依

題畫蘭

綠葉微風際清香小雨餘湘江春水闊愁殺楚三閭

送僧歸洞庭

每憶華山寺高居俯洞庭烟中飛鳥白波面亂峯青
朝依岸禪房夜不扃最憐霜後橘金子爛熒熒

大亭

大亭南昌人

菊山詩

先生卜隱秋山旁繞山種菊延秋芳屈子餐菊有餘樂杜陵摘蕊空悲傷
綠葉漠漠曉多露寒香冉冉天雨霜題詩頗覺幽興遠淮南日暮煙蒼蒼

來復

以下明

來復字見心號蒲庵又號竺曇叟豐城人俗姓黃氏禮南悅楚公爲師虛道園歐陽圭齋諸老皆極

推其詩文元末航海至鄞止定水寺明初召至京
太祖覽其詩褒美賜金襴袈裟授僧錄司左覺義
詔住鳳陽圓通院坐胡黨伏誅有蒲庵澹游二集
按稗史稱見心本姓明名天淵至正間會官翰林
學士後爲僧又載見心應制詩有殊域字觸太祖
怒賜死遂立化於階下

過海羅漢應供圖

大士受齋龍伯宮長驅蛟鰐爭先雄舳艫蔽天不敢渡冰
夷伐鼓洪濤春騰身何來歷汗漫無乃變幻多神通兩僧
後顧冰雪容浮蕉近隨赤鯁公雲端噓氣作樓閣赤日照
耀青芙蓉中有四鬼昇一翁雪眉垂領衣露胸海神候謁
旌旆從赤珠吐燄流星虹跨鰲之叟癯而癯手扶七尺印

州筇是誰彈舌呪老龍火髻電鬣燒雲紅五輪舒光迸五色一輩直渡猶行空前登頗忒定初起欠伸展臂來清風
蹋龜騎魚走百怪擔簦負笈趁羣童入山咫尺見臺殿彷彿微聽青林鐘開圖對我若舊識便欲巢我雲門松世間
浮榮日萬態過眼聚散空花同誰知神變亦虛幻徒逞狡獪驚盲聾何如乘願降跡閭浮中法雷大震開羣蒙王城
分衛飽香積坐令四海歌時雍

次韻張仲舉承旨題盧楞伽過海羅漢圖

僧伽神變妙莫窮去住隱顯如旋風能令大海作平陸超
然獨脫問浮中山君河伯備灑掃錫飛栴渡雲行空安禪
不避魔鬼窟受齋直入龍王宮文犀赤豹時作伍元獫白

鹿日與同騰光噓氣閃奔電天鼓震曜驚雷公世人雖呵
小乘法誰獨高舉隨雲龍我昔衡山問方廣石橋每見馱
經童天姝散花跪雙膝金盤笑捧明珠紅開圖恍忽覩顏
色山海遙隔精靈通那知畫者有深意丹青巧奪造化工
君不聞幻游天地同旅泊我身安得駕鶴從西東

胡侍郎所藏會稽王冕梅花圖

會稽王冕雙頰顧愛梅自號梅花仙豪來寫遍羅浮雪千
樹脫巾大抖成花顛有時百金開買東山屐有時一壺獨
酌西湖船暮校梅花譜朝誦梅花篇水邊籬落見孤韻恍
然悟得華光禪我昔識公蓬萊古城下臥雲草閣秋瀟灑
短衣迎客懶梳頭只把梅花索高價不數楊補之每評湯

叔雅筆精妙奪造化神坐使良工盡驚詫平生放蕩禮法疎開口每欲談孫吳一日騎牛入燕市瞋目怪殺黃髯奴地老天荒公已死留得清名傳畫史南宮侍郎鍊石腸愛公梅花入骨髓示我萬玉圖繁花爛無比香渡禹陵風影落鏡湖水開圖看花良可吁咸平樹老無遺株詩魂有些招不返高風誰起孤山逋

送吳知府之官雷州

雷州太守東吳客儒術傳家尚清白金花東帶紅錦袍玉骨巉巖眼雙碧讀書昔在茗溪陽十年不出芙蓉莊娛親堂上讌春色銀絲作鱸冰雪香丈夫干時須食祿有志匡君貧亦足誰能碌碌困一鄉冷炙殘杯媚豪族剖符今作

炎海遊江風吹上沙棠舟好山南去六千里豈無斗酒消
離憂牽牛花開暗蠻浦雨後怒瀧如瀑布生黎砦口瘴茅
青百尺黃蛇晝當路此邦稍覺風俗殊地無異產民凋疎
况復兵餘少畊鑿撫字欲待重昭蘇我歌折楊柳送君莫
踟躕直度枕椰林落日吟鷓鴣他年考績應重到林下相
期話幽討紫藤無惜贈兩枝我欲看雲藉扶老

題廬山瀑布圖

廬山瀑布天下聞白河倒瀉千丈雲長風吼石吹不斷一
洗浩劫消塵氛我昔潯陽看五老探湫直上青龍嶼六月
飛濤噴雨來灑作冰花滿晴昊是時謫仙邀我錦疊屏山
瓢共酌誇中濡冷光直疑山骨裂清味不作蛟涎腥爾來

漫游身已倦歸老芝巖寄淮甸枕流三峽杳莫期高寒每
向圖中見可憐問津之子徒紛紜高深誰得窮真源大千
溟渤歛一滴汗潢絕港焉足論我知山中有泉無若此便
欲臨淵弄清泚是非不到烟蘿關兩耳塵空何必洗

蜀府命題所藏宣和瑞鶴圖

宣和道君天帝子降靈下作長生主風流不混世間塵清
出冰壺湛秋宇前身雅是太霄君金縑玉策多奇勛感此
仙禽四十翼朝真東度三山雲低回不肯去舞雪依端門
長鳴若有訴飛聲徹崑崙是時道君振衣起遙聽鶴語通
仙意滿毫爲寫青田真龍香更灑親題字朱頂凝丹砂白
羽吹霜袂內府珍藏誰敢沽大貝南金爛無比想當政和

年善治談老莊遂令霞上仙控鶴森翱翔一朝中原成永
訣五國城高臥風雪此時老鶴如可呼便欲騎之上天關
蜀府命題所藏唐十八學士瀛洲圖

十八學士瀛洲仙文彩昭世皆貂蟬廟堂論道豁胸臆作
落開闢神堯天烈烈房與杜樹業光聯翩雅愛虞永興健
筆鍊可穿褚公姚公才湧泉早以儒術窮磨鑄二蘇二薛
何挺特王門獻納相後先主簿倉曹亦英俊天策從事尤
魁然太學先生美雙璧參軍襟度冰雪妍宋州戶曹最清
簡一時風雅同高騫朝談黃石畧暮校白雲篇所思在經
濟末藝焉足傳方今化雨清八埏西堂進講羅羣賢搜材
直欲盡巖穴拔擢遠邁貞觀前畫師殊有意模寫精丹鉛

却令千載後名高日月懸丈夫宏達當如此誰能齷齪困
一瓊我願河清海晏三千年聖人端拱開文淵還期比屋
可封俗淳古不獨圖像誇凌烟

題米南宮雲山圖

南宮米黻生殊方馳名畫史妙莫當墨雲翻空太陰黑功
奪造化開微茫酒酣放筆情爛漫愛寫長林帶溪岸崑崙
移得毫芒間數點浮雲落天半鴨嘴灘頭沙浦通鯉魚浪
颺苔花風山腰路險不可屐飛瀑倒挂青天虹我憶南遊
邇湘沔七十二峰長對面赤壁山高看洞庭一道澄波瀉
秋練人生誰無邱壑懷可奈塵土羈長才子陵不遇劉文
叔釣臺未必高雲臺展圖頗識舊行處彷彿微鐘隔烟樹

荒盡菱租老未歸寄書欲問沙頭鷺

秦淮謠送鄭太守歸光州石盤山

金陵古帝州山水天下壯大江九道通秦淮白頭浪蹴桃花漲一葦不可航倒浸鍾山青虎石何崔嵬高壓長干城年年送人此離別官柳條青幾回折冥鴻望斷三山烟重到憐君頭似雪呼酒鳳凰臺解君金荔枝人生富貴豈不樂角巾歸里今奚爲北渡秦淮水西登石盤山黃鶴招欲來心與雲俱閒草堂只在青松裏大兒將軍小兒喜斑斕舞彩春當筵斫鱸雕盤奉雙鯉我歌秦淮謠送君長淮歸乞得閒身謝明主千金不換秋荷衣莫笑囊無錢留取百篇詩他年太史傳循吏觀風載誦甘棠詞

遊遊方丈歌爲劉嗣庭賦

吾愛淮南王種桂小山裏日與八公徒虛遊閒遁世劉郎
今是淮南孫束書不謁諸侯門東望蓬萊覓方丈扶搖欲
駕天池鵬秀眉長身髮如漆驚座高談頗奇逸浩然俊氣
橫清秋窮途懶屈黃金膝弱水豈無路飛仙邈難期蛻骨
果有術富貴將焉爲男兒胷次隘八區託身何處山巖居
但令忘世卽嘉遯漫遊天地皆蘊廬朝揖洪崖君暮接浮
邱伯挂劍扶桑枝種玉藍田石時人不識烟霞蹤南征北
走如旋蓬九市滾滾炎埃紅白雲半間誰與同我有十笏
地蒨萄園香風乃在天竺飛來之鷲峯斯當掃月度雙澗
金沙別種金芙蓉燕坐獅子牀篝燈聽微鐘願洗玻瓈酌

甘露散花三繞毘耶翁

漁樂圖爲茅指揮題

漁郎家住鸕鷀灣水雲千頃茆三間太平身不識官府只
將網罟營朝餐大兒扳罾露兩膊小兒鳴櫓垂雙鬟烟波
託命作畎畝蒲葦不怕風雨寒東泛白蘋渚西泊黃蘆灘
水邊長覓鷗鷺伴天上那識鸕鷀班得魚歸來慰妻子收
拾絲綸坐蓬底菱租剩有輸官錢沽酒街頭糴新米紫蟹
黃金螯白鯽丹砂尾錯雜羅盤餐交歡聚鄰里有身誰無
衣食謀昨日紅顏今白頭銅駝陌上車如流擾擾塵土何
時休我愛嚴子陵脫身如老鶴釣雪桐江臺高情付廖廓
人生胡爲困羈縛對此新圖想邱壑扁舟弄月歌滄浪誰

似漁家有真樂

赤壁圖爲胡允中賦

江空水落寒無波倚天赤壁高嵯峨雪堂老蘇從二客携
酒夜載扁舟過中流扣舷發棹歌有酒不飲當如何鰕魚
三尺鱸白雪臨風細酌金叵羅酒酣耳熱歌再起直遡空
明三百里一聲孤鶴橫江來明月在天天在水酹月呼嫦
娥仰天聽天語洞簫吹徹廣寒秋却挾飛仙共高舉人生
行樂須及時昨日少壯今日衰功名自昔等炊黍英雄徒
爲曹瞞悲畫史獨何心丹青託千載江雲山月想登臨仿
彿圖中見風采後來遊賞豈乏賢文章不如元祐前萬金
詞賦爛星斗追逐騷雅光聯翩先生別去陵谷遷漠漠宇

宙迷荒烟臨臯鶴夢骨可仙誰同此樂消閒年

題廬陵王子嘉古城讀書處

古城陰處饒古木古城城下烟水綠江上茆堂晝掩扉知
是先生讀書屋先生山澤列仙癯篋無黃金家有書燈火
辛勤三十載添得秋霜生鬢鬚清晨起待簷光白暮讀陳
編眼如月堅心自下董生帷兀坐忘穿管寧榻平生學邁
師古人不賀堂堂八尺身多病豈堪金帶繫歸來獨釣碧
溪春富貴浮雲我何有不如相遇一杯酒古城山色年年
青春風多種門前柳

雨後虛堂夜坐次方東軒參政韻

紫芝巖下寺淡泊偶同居身老計從拙心親迹任疎掃花

風定後題竹雨涼餘時得論清賞篝燈夜榻虛

主上於奉天門賜坐焚香供茶午就賜齋問以宗門
大意首以靈山付囑繼以迦葉感化爲對喜賦詩以

獻

蓬萊雲氣溼袈裟奏對天門日未斜簪部別分香積飯龍
圖親賜上方茶謾論魔佛生同劫最喜華夷共一家山野
自慚無補報散花琪樹讀楞伽

登南嶽祝融峯

石柱盤盤紫蓋東斗衡垂耀亘天中水通巫峽三湘闊地
接炎荒五嶺雄別洞龍歸雲盡黑下方雞叫日先紅一邱
終老從吾願何待黃金布梵宮

鎮嶽高居紫翠間。上封樓殿壓崔嵬。風鳴虎錫神僧定。日射龍旂赤帝來。四色蓮花從地湧。萬年松樹倚雲栽。虛游身在鴻濛外。一覽浮青遍九垓。

題衡嶽天柱峯

一柱通天鎮火維。層標拔起勢孤危。翠磨日月盤三楚。影落沅湘帶九疑。羅漢時來乘白鹿。祝融晝下閃朱旗。神燈夜夜朝金刹。知有高僧禮六時。

白牛爲日本純上人賦

畊雲不住海門東。牧向楞伽小朶峯。露地已忘調伏力。雪山誰識去來蹤。放歸祇樹隨羊鹿。種就曇花伴象龍。一任天關頭角別。水晶池沼玉芙蓉。

山謳

閒占雲霞作近隣
芋田雖薄不嫌貧
五風十雨清平世
萬壑千巖澹泊身
南嶽馬駒應有識
西河獅子久無人
金襴謾笑藏雞足
傳到龍華是幾塵

次韓都事秋懷韻

秋風吹裂菱荷衣
南國書來白雁歸
歲月無情今我老
江山有恨昔人非
拚身易進竿頭步
覆手難防局面機
萬變不須論往事
花前獨立看斜暉

次韻答繆架閣兼柬陳元善都事

書劍東遊客四明
風流從事最多情
酒香邀共山公醉
詩好吟如水部清
洗馬柳陰潮欲白
呼鷹原上雨初晴
龍門

定有重來約掃月青松聽瀑聲

寄天寧楚石禪師

問訊秦川白髮僧風神清出玉壺水舌翻霹靂談千偈心
括虛空悟一乘插竹竿神朝禮座笑花弟子日傳燈元功
已勒浮圖石振策南遊擬共登

送紫首座還日本

揚帆八月挂長風直遡扶桑碧海東雪窟潮翻銀甕白天
門日湧火車紅蝦夷覓偈迎沙島龍伯分齋候水宮應有
國人來問訊散花圍座聽談空

寄龍門琦元璞兼東白雲士瞻方丈

我昔巢松茂苑東白雲清賞此心同芭蕉綠徧題春雨落

菊香傳弄晚風亂後溪山誰作主愁來江海總成翁相思
欲借峯頭鶴騎向龍門問遠公

送日本希白上人禮祖塔之金華

天香吹滿屈眱衣幾度承宣到鳳池梵語傳來西竺戒
音吟得大唐詩樹間遶佛長鳴錫洞裏逢仙不看棋無縫
塔開瞻舍利于江月映碧琉璃

送西域丁鶴年兵後還武昌省親墓

寇亂移家去鄂城白頭重到影鈴塢田歸東里新編甲墓
指西人舊姓丁樵牧不侵經世變松楸無祭泣山靈野棠
花落啼鵲急一酌椒漿老淚零

燕雲何處是并州赤壁磯頭問去舟海關山長鴈旅夢天

荒地老死生愁他鄉寒食身千里故隴斜陽土一坏爲語
東歸華表鶴英雄餘骨幾人收

送雲講師應召還吳門

老病蒙恩逐熱還寶泉頒賜起衰顏木杯度月百花外
掛笠挂雲雙樹間呪罷龍公齋鼓寂講餘獅子定鐘閑也知
去住無心好渾似當時未出山

送戶部徐主事謝官歸豐城

自慚千祿與時疎曉納牙牌別玉除朝鼓罷陳新奏牘夜
燈歸校舊藏書青桑五畝連雲種黃獨千株帶雨鋤藉是
身閒天所放不愁囊澀俸無儲

孺子湖頭水漲沙兵餘南望阻歸槎豪華自昔應多士文

獻于今尙幾家鍊井蛟涎腥夜雨劒池龍氣溼朝霞煩君
爲問樟陰寺誰布黃金掃土花

御賜圓通禪寺後以詩寄善世全室

龍河再鎮感皇情倡道從來屬老成睹史夜摩皆聽法震
丹竺國總知名日邊華構開金剎海上孤峯見赤城寶掌
有符重應記虛空同壽祝升平

耕隱爲南昌萬用中賦

山莊別築楚城西百畝乘陰水一溪莎草雨晴黃犢臥稻
花風煖白鳩啼沾來官酒春新社讀罷農書曉灌畦孝悌
力田新有詔姓名還向御前題

送錢子子新除博士致政還越中

除書新拜荷明君
祖別春筵采泮芹
餐玉未從仙老試
賜金應與故人分
淖船夜渡娥江月
山屐晴探禹穴雲
龍節虎符勛烈舊
過家先讀表忠文

修髯如雪面如丹
芟製新成野服寬
湖近季真期卜宅
寺依靈徹話休官
霜紅柿葉尊前寫
月白荷花鏡裏看
有約沃洲騎鶴去
臥雲不畏碧山寒

次衛府危朝獻紀善見寄

君談東魯我談禪
淮海相聞歎暮年
劉向才名遺說苑
楊雄詞賦重甘泉
收來柿葉朝頻寫
吟到梅花夜不眠
早晚定逢濠上寺
三生舊話待重圓

過越王臺

人道耶溪好青山罨畫開荷花三百里無數白鷗來

次韻王敏文待制燕京雜詠

暖風吹雨灑香埃丹鳳樓高錦幄開膜拜兩街花簇騎金
幢爭看刺麻來

曉宴皇姑拜上家金錢滿賜橐駝車黃門前導飛鞋過貂
帽斜簪利市花

南風吹到運糧船萬斛香粳倍上年傳敕漕臺添氣力賜
金多辦太平筵

錦貂公子躍龍驤不怕金吾夜漏催阿刺聲高檀板急棕
毛別殿宴春回

鴨綠微生太液波芙蓉楊柳受風多日長供奉傳新譜教

舞天魔隊子歌

秋滿龍沙草已霜射鵬風急朔雲長
內宮連日無宣喚獵取黃羊進尙方

寄神樂觀鄧仲修仙宦

開徧溪頭巨勝花雪精雙引紫雲車
忽傳青鳥催春宴爛醉金桃阿母家

紫翠房深敞石屏神仙鍊液漱清泠
鍊符催起龍行雨白日風雷走六丁

奉祠曾謁會稽山湖曲天風振珮環
一色荷花三百里洞簫吹月鏡中還

好溪漁歌

少微山下萬松青，
銕笛携將過水亭。
吟得竹枝新有譜，
秋風吹與老龍聽。

鶴灘沙寒雪滿川，
歸來穩繫釣魚船。
五更騎馬長安道，
不似蘆花被底眠。

送金員外歸泉南

曾說西遊過月支，
讌酣花市踏春歸。
兜羅香帶薔薇露，
猶是我王舊賜衣。

朱樓別起擁飛霞，
浮石橋邊久住家。
海日浴紅春雨霽，
鷓鴣啼上刺桐花。

車駕臨蔣山於崇禧寺賜高僧齋議設無遮會漫成
口號

祇園花雨曉吹香
手結袈裟近御床
闕下紫雲隨雉尾
座間紅日動龍光
金盤蘇合頒殊域
玉盃醞醕出尙方
稠疊屢承天上供
每慙無德頌陶唐

奉柬周伯溫左丞

學士風流玉雪標
早陪鳳輦聽仙韶
光分蓮炬從天下
香帶爐烟近日飄
書擬漢秦誇二篆
史修南北見三朝
承恩曾記東來日
繡斧光華擁使輶

奉寄月彥明中丞

三月扁舟渡鑑湖
棟花風急雨晴初
共知出處心無愧
自信經綸志未疎
海上雲霞明繡斧
人間奎壁煥圖書
中興近報王師捷
微詔行看下玉除

次芝軒中丞韻

執法南從越絕居，繡衣光彩照坤輿。
黃金遺子無私橐，白髮匡君有諫書。
遠捷已飛江上羽，羣凶真作釜中魚。
歸朝定策中興業，笑我山林與世疎。

送胡文善之官海南文昌縣

瓊州南去海冥冥，嫠女垂光應地靈。
洞入朱耶瀧水白，山蟠黎母瘴烟青。
郵炊每食桄榔麪，蠻賦多輸翡翠翎。
定有遠人歌善治，風謠紀德重鐫銘。

九域于今總一家，文昌誰道隔天涯。
石榴紅釀蠻江酒，海漆香收瘴洞花。
寨上人耕春作市，棠陰吏散晚休衙。
蘇公應共題詩好，僚耳泉頭駐小車。

次韻趙子將提舉秋興

絕漠風高雨土沙五雲何處望京華
南徵尙阻勤王貢北汎頻勞奉使槎
藩將戈船遙蔽海國人弓馬舊爲家
洗兵會有承平日社稷安危不用嗟

遊石湖蘭若

荷花蕩西湖水深上有蘭若當高岑
客吟時見猿鳥下僧定不聞鐘磬音
雨香秋林橘子熟雲落空磴棠梨陰
間來掃石坐竹裏靜與山人論素心

五龍之峯雲作屏雙崖削出芙蓉青
何人磻裏拾瑤草有客松間尋茯苓
林風不驚虎臥石山雨忽來龍聽經
吳王臺榭今寂寞秋香薜荔花冥冥

寄洞庭葉隱君

一舸南歸鬢欲華，買山湖上臥烟霞。
尊知北海應多酒，園擬東陵亦種瓜。
丹壑泉春雲碓藥，橘林風掃石牀花。
傳家自與隣翁異，只說藏書有五車。

西湖雜詩

芙蓉灣口綠陰斜，吹笛何人隔彩霞。
驚起沙頭雙翠羽，銜魚飛上刺桐花。

寶網金幢變劫灰，瞿曇寺裏盡蒿萊。
鳥窠無樹山夔泣，不見談禪太傅來。

流觴亭子鳳山阿，都護行春小隊過。
笑擲金錢花底醉，玉簪彈出白翎歌。

荷鋤耕叟餉蒸梨家在官塘九山西白髮強談兵後事眼
枯無淚向人啼

掩關

槁木形骸百念灰溪猿野鶴苦相猜閒門獨掩青松雨笑
口逢人亦懶開

題趙松雪馬圖

振鬣長鳴產月支玉關風急貢來時五花獅子真龍種賜
出黃門不敢騎

題夏珪風雨行舟圖

君遊南越我西秦盡日江頭採白蘋無限波濤起平陸順
風休笑逆帆人

題宋徽宗喜鵲圖

黃沙風急蕩秋回首中原淚暗流
誤聽當時靈鵲語誰知舊喜是新愁